





蜀錄二

春秋卷第七十七

魏散騎常侍崔鴻撰

李流

李流字玄通特第四弟也少好學便弓馬東羗校尉何攀見而奇之稱流有賁育之勇舉爲東羗督護及避地益州益州刺史趙廞甚器異之乃使庠收合部衆流亦招鄉里子弟得數千人及庠爲廞所殺流從特安慰流民破常俊於緜竹平趙廞於成都朝廷論功拜奮威將軍武陽



鄉侯特初承制以流為鎮東將軍居東營號為  
東督護常統銳眾與益州刺史羅尚相持尚不  
能破特既見殺蜀人多叛流與特子蕩雄收集  
餘眾還於赤祖流自稱大都督大將軍益州牧  
保東營蕩雄保北營時荊州刺史宋岱率水軍  
三萬助尚次於墊江前鋒建平太守孫阜攻破  
德陽獲特所署太守任臧守將騫碩等退屯涪  
陵縣三月尚遣督護常深軍毘橋又遣牙門左  
氾黃閭何冲三道攻之進次繁城縣竹守將詣

涪陵民藥紳杜阿等亦起兵應尚流與其弟  
驤拒深使蕩雄拒紳何冲乘虛攻北營氏符成  
隗伯石定在營中叛應之攻蕩雄母羅氏擐  
甲拒戰伯手刃羅傷其面晉書作目羅氏壯氣益烈  
時成伯戰於內冲等攻其外自晨至日中營垂  
欲破會驤破深柵深士眾星散蕩雄亦攻破紳  
各引兵還與冲等戰大破之成伯率其黨突出  
詣尚流等乘勝進抵成都尚復閉城自守蕩馳  
馬逐北為僂長矛所椿死朝廷復遣侍中燕國



劉沉假節統益州刺史羅尚梁州刺史許雄等  
 軍討流行次長安河間王司馬顥請留沉為軍  
 師遣席遠代之流以特蕩繼死而岱阜將至甚  
 懼太守李含又勸流降流將從之驤與雄迭諫  
 不納夏五月流遣子世及含子胡為質於阜阜  
 不許胡兄離為梓潼太守聞父舅欲降自梓潼  
 馳還欲諫不及退與雄謀襲阜軍曰若功成事  
 濟當為人主要三年一更一作約與君雄曰與  
 君計雖定老子不從一作今計可將若之何離

曰今當制之若不可制便行大事雖君叔父勢  
 不得已老父在君夫復何言雄大喜乃共誘說  
 六郡流民曰吾屬前已殘暴蜀民今一旦束手  
 便為魚肉惟有同心襲阜以取富貴耳眾皆從  
 之雄遂與離襲破阜軍死者甚眾會宋岱卒於  
 墊江荆州軍退轉攻尚流慙其短大奇雄才軍  
 事悉以任雄雄進攻尚軍尚保太城中六月雄  
 從帛羊頽渡江攻殺汶山太守陳圖遂取郫城  
 秋七月朔雄入據郫城流盡移營屯之三蜀百



姓皆保險結塢或南入寧州或東下荊州城邑皆空野無烟火流虜掠無所得士眾饑乏惟涪陵民千餘家在江西依青城山處士范長生平西叅軍涪陵徐輿說尚求爲汝山太守欲邀結長生等與尚犄角討流尚不許輿怨之乃求使江西叛降於流流以輿爲安西將軍輿說長生使資給流軍糧長生從之流軍得以復振九月流疾篤謂諸將曰驍騎高明仁愛識量多奇固足以濟大事然前軍英武殆天所相可共受事

於前軍以爲成都王也遂死時年五十六諸將共立雄爲主雄僭稱尊號追謚流曰秦文王以其子龍嗣

### 李雄

李雄字仲雋特第三子也母羅氏夢雙虹自地升天一虹中斷旣而生蕩後羅氏因汲水忽然如寐又夢大蛇繞身遂有孕十四月而生雄常言吾二兒若有先亡在者必大貴蕩竟前死雄身長八尺三寸容貌魁偉少時廣漢太守辛冉



見而奇之曰此相當貴又有術士相之曰此君將貴其相有四目如重雲鼻如飛龍口如方器耳如相望法為大貴位過三公不疑也雄少有烈氣每周旋鄉里識達之士皆器重之太康中有劉化者道術士也每謂鄉里曰關隴之士皆當南移李氏子中惟仲雋天姿奇異有大貴之表終為人主也鄉里人多善之與叔父庠並以氣烈聞人爭歸之特起兵於蜀稱益州牧承制以雄鎮梓潼拜前將軍流亦素重雄有長者之

德每云興吾家者必此人也勅諸子尊奉之及流死雄自稱大都督大將軍益州牧都郾城乃募武都人朴泰鞭之見血使給羅尚曰李驤與雄以饑餓孤危日鬪爭相舛驤欲將民江西食穀若潛軍入郾城我為內應城可得也尚以為然大與金寶泰曰今事故未立效後取未晚也又求遣人自隨覘伺尚益信之悉出精兵使隗伯等將之從泰攻郾泰約舉火為應驍騎將軍驤於道設伏泰以長梯倚城而舉火隗伯兵見



火起皆爭緣梯上秦又以繩汲上伯軍百餘人皆斬之驤因縱兵內外逆擊大破之追奔逐北夜至城下詐稱萬歲曰已得郟城矣入少城尚乃覺之退保太城隗伯創甚雄生獲之伯女爲梁雙妻時雙爲雄用故赦不殺旣而復叛驤別攻捷爲斷尚運道獲郡守龔恢恢先爲天水西縣令任回爲吏回問曰識故吏否恢曰識汝耳郡吏星散惟功曹楊渙侍衛回謂渙曰卿義人也吾力恐不能救龔君不能免卿也宜早去渙

曰背王求生何如守義而死遂并見殺雄以李溥爲捷爲太守初尚之在郟城也與雄攻戰郟令捷爲張昕欽明每摧破雄雄屢戰之而昕等救助不能并心爲雄所殺雄常言使羅尚將皆如張昕輩吾族早無遺矣時牙門左汜亦有戰功尚不益其兵穀汜甚恚恨以母喪歸尚累召不往尚怒曰微左汜當不復滅賊乎遂殺之雄聞汜死大小相賀冬十二月雄急攻尚尚糧運不繼軍士無食留牙門張羅固守尚委城由牛



鞞水夜遁比雄覺去已遠倉卒失節鉞羅從後得之并獲資應乃開門納雄遂剋成都盡有其地雄軍甚饑餒率眾就穀於郫山掘野芋而食之蜀民流散東下江陽南陵七郡

建興元年春正月羅尚逃至江陽遣使表狀詔尚權統巴東巴郡涪陵以供軍賦尚遣別駕李興詣鎮南將軍劉弘求糧弘綱紀以運道阻遠且荆州自空乏欲以零陵米五千斛與尚弘曰天下一家彼此無異吾今給之則無西顧之憂

矣遂以三萬斛給之尚賴以自存雄以西山范長生有名德為蜀民所重欲迎以為君而臣之長生固辭雄乃深自挹損不敢稱制事無巨細皆決於李國李離兄弟國等有智謀凡事必諮而後行然國離事雄彌謹楊驥楊珪等諸將固請雄即尊位遂以晉永興元年冬十月僭稱成都王即位於南郊大赦境內殊死已下改元建興除晉法約法七章以叔父驤為太傅庶兄始為太保折衝將軍離為太尉從弟建威將軍雲



為司徒翊軍將軍璜為司空材官將軍國為太  
 宰閻或為尚書令楊褒為左僕射楊驥為右僕  
 射楊發為侍中楊珪為尚書楊洪為益州刺史  
 徐興為鎮南將軍王達為軍師其餘文武拜授  
 各有差追尊曾祖虎巴郡桓王祖慕隴西襄王  
 父特成都景王母羅氏為王太后追謚世父輔  
 為齊烈王仲父庠為梁武王仲父流為秦文王  
 兄蕩為廣漢壯文公十一月羅尚移屯巴郡遣  
 兵攻掠蜀中斬雄從祖冉獲驤妻胥氏及子壽

等十二月太尉離寇漢中殺都戰帥趙汶轉寇

梁州

晏平元年春三月范長生自西山詣成都雄門

迎執板延坐拜為丞相尊之曰范賢從弟置流

子也以不陪列殺之夏六月長生勸雄稱尊號

雄於是以晉光熙元年僭即皇帝位大赦境內

殊死已下改元晏平國號大成華陽國志作國號太武晉載記

作改年追尊父特為景皇帝廟號始祖母羅氏

曰太武為皇太后秋七月遣太傅驤寇漢安冬十月加



范長生天地太師封西山侯復其部曲不豫軍  
征租稅一入其家諸將恃恩互爭班位尚書令  
閻或上疏請考漢晉故事立百官制度雄從之  
是年造刀五百口銘其文曰騰馬隸書

晏平二年春二月關中一作秦州流民鄧定旬氏等

二千餘家饑饉流入漢中保於城固漸為抄盜

梁州刺史張殷遣巴西太守張燕帥牙門武肇

漢國郡丞宣定討之鄧定窘急偽乞降於燕併

餽金銀於燕燕喜為之緩師定又密遣氏結雄

夏五月雄遣太尉離太宰國司徒雲司空璜等

帥眾二萬救之離等至先攻殷營營破次攻定

又破之燕懼戰將百餘騎遁走離等大破州軍

進次漢中逼之漢中太守杜孟治一作正冲遣

牙門蔡松規離形勢松退告孟治曰州軍已破

賊眾不可待也孟治懼護軍欲城守謂孟治曰

賊來雖眾客氣之常柰區區有東南之偏必不

分兵於外不過迎援定氏耳孟治曰不然雄冒

稱帝王縱橫天下以遣重眾必取漢中雖有牢



城不可與戰是待寇也乃開門退走護軍北還  
 孟治入大桑谷民數千家車數千輛一夜行纔  
 十里而梓潼荆子以父與孟治有隙合宗族  
 追之及於谷口孟治棄子走荆子追獲其  
 吏民千餘家惟漢國功曹母丘建荷檐杖  
 不肖一國夫國亡不能存終不屬賊  
 也餓 荆中孟治走至魏興張殷亦棄官而遁  
 林官將軍梁州刺史張光方欲赴州不得  
 止於魏興乃會諸郡守共謀進取張燕唱言曰

漢中荒敗迫近大賊克復之事當俟英雄孟治  
 曰張燕受賊金銀不時進討阻兵緩寇致喪漢  
 中寔燕之罪也光於是發怒呵燕令出斬之以  
 狗離等攻陷南鄭引兵而還盡徙漢中民於蜀  
 漢中民旬方白落帥吏民還守南鄭雄復遣太  
 尉離寇梁州

晏平三年冬十二月尚書令楊褒卒先是南土  
 頻歲饒疫死者十萬餘計南夷校尉李毅曲加  
 撫集雄攻之固守不降雄復誘建寧夷使為寇



掠會毅病卒城陷殺壯士三千餘人送婦女千口於成都漢中流民逼李鳳寇掠東走荆沔時有白鳥赤足來翔雄以問范長生長生日鳥有反哺之義必有遠人懷惠而來者果關中流民相繼請降

晏平四年冬十月太尉離據梓潼其部將略陽

羅羨晉載記作羨天水張金苟琦等殺離及尚書

令閻或以梓潼歸羅尚尚遣平西叅軍向奮屯

安漢之宜福折衝將軍張羅屯平無以逼雄雄

帥太傅驤司徒雲司空璜攻奮不克雲璜力戰

死之十二月琦等送離母子於尚尚斬之分其

室

晏平五年春正月太宰大將軍國鎮巴西帳下

天水文碩殺國以巴西降羅尚夏五月雄引歸

成都初譙周有子居巴西西太守馬脫殺之

其子登詣鎮南將軍劉弘請兵以復仇弘無兵

與之乃表登為揚烈將軍梓潼內史使自募巴

蜀流民得二千人西上至巴郡從羅尚求益兵



不得遂進攻宕渠斬馬脫剖其肝而食之梓潼降登登進據涪城雄自率衆攻之爲登所敗張羅進據犍爲之合水巴蜀爲之語曰譙登治涪城文碩在巴西張羅守合水巴氏那得前冬十月羅尚卒太傅驤攻譙登於涪城益州刺史皮素次巴東敕平西將軍張順楊顯救登尚子宇及叅佐素疾登不給其糧素怒至涪欲治其罪執事懷懼十二月素至巴郡宇使降人天水趙攀閻蘭等夜襲殺素建平都尉暴重殺宇及攀

巴郡大亂不果救登驤知登食盡援絕攻涪愈急登固守不下士卒皆熏鼠而食餓死甚衆無一人離叛者驤子壽先在登所登乃遣之歸三府官屬表巴東監軍冠軍將軍南陽韓松爲益州刺史治巴東

玉衡元年春正月乙亥太傅驤攻拔涪城執登遂乘勝遣太保始督部將李鳳等進攻巴西討文碩殺之巴西梓潼復爲雄有雄大悅大赦境內殊死已下改元玉衡譙登至成都雄欲宥之



登詞氣慷慨涕泣唏噓無復降臣折情雄乃殺之囚其軍士畀奴虜而連陰雨百餘日雄終以登爲枉而所領無辜怨氣感天下赦出登軍士湮沒者二月氏符成隗文作亂宜都西上巴東雄衆攻棘道走捷爲太守魏紀殺江陽太守姚襲三月氏隗文等反於巴東秋八月己亥梁州太守王鑿粗暴郡民毛深王騰及陰平都尉董冲逐出之遂以郡叛相率歸雄是歲母羅氏卒雄姨弟任小受巴郡太守張羅募手刃雄頭雄幾死

王衡二年春正月流民楊武大略漢中吏民來奔梁州人張咸等起兵逐氏王楊茂搜茂搜去咸以其衆歸雄於是南陽一作漢嘉涪陵遠人相繼而至漢中之地皆爲雄有遂分漢嘉蜀二郡立沉黎漢原二郡下寬大之令新附者悉假復除

王衡三年春三月西夷校尉向流卒涪陵多疫癘蜀郡太守江夏鄭融宜都太守捷爲楊茂西



夷司馬巴郡常歆都安令蜀郡常倉弘等共推  
汝山太守蘭繼爲西夷校尉時中原喪亂江東  
有事救援無所顧望融等率吏民北出枳欲下  
巴東雄遣李恭費黑邀擊獲之扶風鄧芝等各  
率流民前後數千家來歸

王衡四年春正月雄以鳳爲征北將軍梁州刺  
史任回爲鎮南將軍南夷校尉寧州刺史恭爲  
征東將軍南蠻校尉荊州刺史雄虛已好賢隨  
才授任皆得其用益州遂定太傅驥養民於內

鳳等招懷於外刑政寬和

一作簡

獄無滯囚興學

校置史官其賦民男丁歲穀三斛女丁半之疾  
病又半之戶調絹不過數丈綿數兩事少役稀  
民多富實時天下大亂而蜀獨無事年穀屢熟  
乃至閭門不閉路不拾遺天水陳安舉隴右來  
降武都氏王楊茂搜奉貢稱臣杜弢自湘州遣  
使求援涼州刺史張駿遣使交好晉平夷太守  
朱提雷炤殺南廣太守孟桓帥二郡三千餘家  
叛降漢嘉夷王冲遣子爲質頃之與建寧爨亮



偕來歸附巴郡嘗告急云有晉兵雄曰吾嘗憂石勒跋扈琅邪微弱恐爲侵逼以爲耿耿不圖今日乃能舉兵使人欣然雄意在招懷遠方國用不足諸將每進金銀得官者朝無威儀爵位濫溢吏無祿秩取給於民軍無部伍號令不肅初僕射楊褒每切諫之雄不能改

王衡五年春正月立妻任氏爲皇后

王衡六年雄復於陽關更置塾江縣亦屬巴郡  
王衡七年

王衡八年夏四月范長生卒以其子侍中賁爲丞相冬十二月雄梁州刺史鳳在北屢立戰功雄兄蕩子稚在晉壽害其功大鳳以巴西叛太傅驤討之久住梓潼不敢進兵雄自至涪城督驤討鳳斬之以壽爲前將軍都督巴西諸軍梁州刺史鎮巴西

王衡九年冬十月雄使征東大將軍恭及將軍羅演寇巴東

王衡十年春晉江陽太守廬州侯馥招降夷獠



修繕舟艦爲進取之計預白寧州刺史王遜請  
軍移牂柯太守謝恕俱出涪陵不能自前征東  
大將軍恭帥衆攻馥衆寡不敵爲恭所破獲生  
虜馥送雄雄下廷尉責之馥曰事君有死無二  
其次破家與國今縱不死又無益國灰沒其分  
守心而已無他顧望雄必欲臣之使馥同郡人  
張迎曉諭之馥怒罵迎曰吾等國亡不能存大  
難不能死低眉海內何面目相見也且王寧州  
治亂才也以吾有桑梓之耻故遠上尚書遣吾  
討賊受命之日實忘寢食但裁船未辦請軍未  
至牽揣不及爲他所先當滅身隕碎以謝不及  
冀上不負日月下不愧王侯吾豈苟生如卿兒  
女之人乎迎還白雄雄義而赦之時雄衆寇所  
獲捷爲太守建寧魏紀漢國太守梓潼文琰巴  
郡太守巴西黃龕永昌謝俊牂柯文猛皆區區  
稽顙無如馥者數年卒  
王衡十一年氏王楊難敵及弟堅頭爲劉曜所  
破奔葭萌遣子入質

十六國春秋 卷七十七

五



王衡十二年春二月隴西賊帥陳安復來歸附  
夏五月雄將張龍寇巴東建平太守柳純擊走  
之

王衡十三年春正月時晉太寧元年也雄遣太  
傅驤與鎮南將軍任回寇臺登將軍司馬玟死  
之又分兵寇朱提遂嵩二郡越嵩太守西夷校  
尉李釗漢嘉太守王肅等反降於驤夏五  
月驤等進軍由小會攻南夷校尉寧州刺史王  
遜遜使將軍姚嶽一作崇等悉眾拒之戰

於蟾堂嶽一作狼驤軍不利又遇霖雨引還嶽追至

瀘水土眾爭濟溺水死者千有餘人嶽以道遠

不敢渡水而還遜以嶽不窮追也大怒囚群帥

執嶽鞭之恚忿益甚髮上衝冠冠為之裂夜中

而卒秋七月初氏王楊難劼奔葭萌趙主劉曜

遣鎮西將軍劉厚追擊之難劼送任請降於雄

雄安北將軍稚蕩之第二子也時守葭萌受其

賂賄不送難劼於成都及趙兵退稚即遣還武

都難劼遂據險不服稚自悔失計連白雄請討



雄許之羣臣多諫雄不從遣稚兄侍中中領軍  
瑒統稚攻難劼由白水道遣征東將軍壽與稚  
弟珩由陰平入二道討難劼難劼等先拒壽珩  
壽珩不得進而瑒稚長驅至下辨大爲難劼所  
破瑒稚皆死死數千人雄深自悔責以謝百  
姓

王衡十四年春正月雄后任氏無子將立蕩子  
班爲太子雄有妾子十餘人羣臣咸欲立雄所  
生雄曰起兵之初舉手扞頭本不希帝王之業

值天下喪亂晉氏播蕩群情義舉志濟塗炭而  
諸君遂見推逼處王公之上本之基業功由先  
帝吾兄適統丕祚所歸恢懿明獻殆天所命大  
事垂成薨於戎陣朕常悼之且班姿性仁孝好  
學夙成必能負荷大任孫仲謀割有江東伯符  
兆基子止侯爵國志耻之宣公舍子立弟君子  
以爲知人吾欲彌縫國志之耻以繼宣公之美  
太傅驤與司徒王達諫曰先王樹冢適者所以  
明定分而防篡逆誠不可不慎也吳子舍其子



而立其弟所以有專諸之禍宋襄不立與夷而  
立穆公卒有宋督之變猶子之言豈若子也深  
願陛下思之雄不從竟立班為太子使任后母  
之驥退而流涕曰亂自此始矣冬十二月張駿  
遣叅軍傅穎治中張淳修好於雄乃遣雄書勸  
去尊號稱藩於晉雄引見復書曰吾過為士大  
夫所推然本無心於帝王也貴州將令行河沙  
常所希冀進思為晉室元功之臣退思共為守  
藩之將掃除氛埃以康帝宇而晉室凌遲德聲

不振引領東望有年月矣會獲來貺情在閭室  
有何已已知欲遠遵楚漢尊崇義帝春秋之義  
於斯莫大穎等還涼復命駿重其言使聘相繼  
建寧熲亮益州太守李暹梁州太守董懂以興  
古叛降於雄

玉衡十五年

玉衡十六年秋九月雄將張龍寇涪陵執太守

趙俊 晉帝紀  
作謝俊

玉衡十七年春正月越雋斯叟反寧州秀才龐



遺起義兵應之攻圍鎮南將軍任回及太守李謙等雄遣征南將軍羅恒費黑救之寧州刺史尹奉遣裨將姚嶽朱提太守楊術援遺戰於臺登嶽等敗績術力戰死夏四月斯叟破秋九月謙移郡民於蜀冬十月雄將張龍復寇涪陵涪陵太守巴西趙弼為龍所擒

玉衡十八年

玉衡十九年春雄以中原喪亂頻遣使朝貢欲與穆帝分天下先是張駿領秦梁遣傅穎來假

道通表京師雄弗許至是年又遣治中從事張淳奉貢稱藩託以假道雄大悅謂淳曰貴主英名蓋世土險兵強何不稱帝自娛一方淳曰寡君以乃祖乃父世濟忠良未能雪天下之深耻解蒼生之倒懸日晏忘食枕戈待旦以琅邪中興江東故萬里翼戴將成桓文之事何自娛之有邪雄有慙色曰我乃祖乃父本亦晉臣遭天下大亂與六郡流民避難此地為眾所推遂有今日琅邪若能中興大晉於中夏者亦當率眾



附之耳乃厚禮而遣之淳遂通表京師

玉衡二十年秋太傅驤死追贈相國謚曰漢獻  
王其子壽以喪還雄拜珩征北將軍梁州牧代  
壽又以太子班行撫軍將軍修晉壽軍屯尋拜  
壽爲都督中外諸軍事大將軍領中護軍西夷  
校尉錄尚書總統如驤故事冬十月壽督征南  
將軍費黑征東將軍任邵攻陷巴郡太守楊謙  
退保建平壽別遣費黑寇建平監軍母丘

奧退屯宜陽

一作宜都

玉衡二十一年春正月壽引還遣任邵屯巴東  
雄以子越爲車騎將軍屯廣漢秋七月壽攻陰  
平武都氏王楊難敵降之冬十月城涪縣

玉衡二十二年秋七月丙寅雄遣大將軍壽寇  
寧州以征東將軍費黑爲司馬與任攀等爲前  
鋒由廣漢入又遣鎮南將軍任回子調由越巂  
征木落以分寧州之援冬十月壽黑至朱提朱  
提太守捷爲董炳嬰城自守寧州刺史尹奉遣  
建寧太守霍彪大姓爨琛等引兵助之時壽已



圍城欲逆拒彪黑曰料城中食少彪等雖至齎糧不多宜縱彪入城共消其穀猶嫌其少何爲拒之壽以爲然引兵而退彪等入城攻久不下壽欲急攻之黑曰南中險阻反亂難服當以日月制之待其智勇俱困然後取之溷牢之物何足汲汲也壽不從攻之果不克乃悉以軍事委黑自引而還

王衡二十三年春正月雄復遣大將軍壽等攻朱提朱提太守董炳及建寧太守霍彪皆詣軍

門降威振南中

一作十三郡

三月寧州刺史尹奉舉

州來降遷奉於蜀遂有南中之地雄於是大赦境內殊死已下以壽領寧州刺史復置南廣郡以興古太守朱提李播爲太守秋七月建寧牂柯二郡謀叛壽復擊取之使班討平寧州夷以班爲撫軍將軍

王衡二十四年春正月雄分寧州置交州以霍彪爲寧州刺史爨琛爲交州刺史封壽爲建寧王三月壽還夏五月雄寢疾生瘍於頭召大將



軍建寧王壽受遺詔輔政六月丁卯雄卒時晉成帝咸和八年也雄年六十一在位三十年為謚武帝廟號太宗冬十二月丙寅葬安都陵太子班嗣

鹽官姚士舜校

春秋第七十七卷

蜀錄三

春秋卷第七十八

魏散騎常侍 崔鴻撰

李班

李班字世文蕩第四子也少而聰慧見養於雄初署平南將軍年十六立為太子謙虛博納敬愛儒賢自何點李釗班皆師事之又引名士王嘏及隴西董融天水文夔等以為賓友每觀書傳謂融等曰吾每觀周景王太子晉魏太子丕吳太子登文章識鑒超然卓絕未嘗不有慙色



何古賢之高朗後人之莫逮也爲性汎愛動修軌度失在輕躁雅好田獵時諸李子弟皆尚奢靡而班常戒厲之每朝有大議班輒令豫之班以古者墾田均平貧富獲所今貴者廣占荒田貧者種殖無地富者以已所餘而賣之此豈王者大均之義乎班深納之班少數攻戰多被傷瘐至是寢疾舊痕皆膿潰班子越等皆惡而遠之獨班晝夜侍側不脫衣冠親爲吮膿殊無難色每嘗藥流涕其誠孝如此班死遂嗣僞位以

建寧王壽錄尚書事輔政政事皆委於壽及司徒何點尚書令王瓌等班居中行喪禮一無所預秋九月班子車騎將軍越鎮江陽奔喪至成都以班非班所生意甚不平與弟安東將軍期密謀作亂班弟玠勸班遣越還江陽以期爲梁州刺史鎮葭萌班以未葬不忍卽遣推誠居厚無所疑間一云心無纖介遣玠出屯於涪時有白氣二道帶天太史令韓豹奏曰宮中有陰謀兵氣戒在親戚深宜慎之班不悟冬十月癸亥越期因



班夜哭弑之於殯宮并殺班仲兄領軍將軍都  
矯太后任氏令罪狀班而廢之時年四十七在  
位一年衆欲立越越奉期而立之期既卽位謚  
班曰戾太子及壽立追謚曰哀皇帝子幽顯爲  
期所殺

### 李期

李期字世運雄第四子也其母冉氏賤雄妻任  
氏養以爲子少聰慧攻學問容貌都雅弱冠能  
屬文輕財好施虛心接引又多才藝蚤有名譽

初爲建威將軍雄令諸子及宗室子弟各以恩  
信募合部衆多者纔得數百人而期獨得千餘  
人遷安東將軍凡所表薦多納用之故長吏列  
署頗出其門越旣殺班乃讓位於期遂以十月  
甲子僭卽皇帝位進壽梁州刺史大都督東羗  
校尉中護軍徙封漢王以兄越爲相國封建寧  
王加大司馬大將軍與壽並錄尚書事以仲兄  
霸爲鎮南中領軍弟保爲鎮西北夷校尉汝山  
太守從兄始爲征東代越鎮江陽皆進大將軍



丙寅葬雄於安都陵征東始欲與壽共攻期壽不敢發始怒反譖壽於期請殺之期欲藉壽討玠故不許乃遣壽將兵向涪壽先遣使告玠說以去就利害開其去路玠遂棄城與其將焦會羅凱等並奔降晉期卽拜壽爲梁州刺史屯涪城

玉恒元年春正月立妻閻氏爲皇后大赦境內殊死已下改元玉恒以衛將軍尹奉爲右丞相驃騎將軍尚書令王瓌爲司徒司隸校尉景騫爲尚書令征南將軍費黑爲司隸班舅羅演爲僕射秋九月班舅羅演與漢王相天水上官澹等謀殺期立班子幽事覺期殺演澹及班母羅氏瑤子礮稚妻咎氏期自以謀大事旣果輕諸舊臣外則信任尚書令景騫尚書姚華田褒內則信任中常侍許涪等慶賞刑威希復關之卿相皆決於數人而已褒無他才執雄時常勸立期故寵待甚厚由是紀綱法度蕩然隳紊雄業衰矣



十六國春秋卷之八  
玉恒二年冬十月期以從子尚書僕射武陵公  
戴有雋才忌之誣以謀反下獄賜死十一月晉  
遣建威將軍司馬勲安集漢中期遣漢王壽攻  
之城陷遂置守宰戍南鄭而還雄子鎮南大將  
軍霸鎮北大將軍保不病而死皆云期鳩殺之  
於是大臣危懼人不自安而期志益廣忽慢公  
卿政刑失措是年天雨大魚於宮中其色黃又  
宮中豕犬交木冬華連年災火雨血地震生毛  
鷓鴣集於城下

玉恒三年春三月大風拔樹發屋期驕虐日甚  
多所誅殺藉沒資財婦女以充後宮內外冤冤  
道路以目諫者獲罪人懷苟免漢王壽素貴重  
有威名期及建寧王越等皆忌之壽懼不免每  
當入朝嘗詐爲邊書辭以警急密問龔壯謀以  
自安遂與長史略陽羅恒巴西解思明謀攻成  
都期頗聞之數遣中常侍許涪至壽所伺其動  
靜又鳩殺壽養弟安北將軍攸於是與越及景  
騫田褒姚華潛謀襲壽欲因燒市橋而發兵壽



聞大懼且疑許涪往來之數也乃率步騎一萬餘人自涪向成都表稱騫等亂政興晉陽之甲以除君側之惡以李奕爲先登越等請散財募士格戰期謂壽不自薄不許及壽到成都期不虞其卒至既不設備壽世子勢爲翊門校尉開門納之遂尅成都屯兵宮門期遣侍中勞壽壽奏相國建寧王越尚書令河南公景騫尚書田褒姚華中常侍許涪征西將軍李遐及將軍李西等皆懷奸亂政謀傾社稷大逆不道罪合夷

滅期從之於是殺騫越等縱兵大掠三日乃定夏四月壽矯太后任氏令廢期爲邛都縣公幽之別宮期嘆曰天下主乃當於小縣公不如死也自縊而死五月誅始等兄弟十餘人期年二十五在位三年謚曰幽公及葬賜鸞輅九旒餘如王禮徙其妻子於越雋又使人就越雋殺之

### 李壽

李壽字武考特季弟驤之少子也有局幹夔尚禮容敏而好學雅量豁然志度少異於諸子雄



甚奇其才以為足荷重任拜前將軍督巴西諸  
 軍事遷征東將軍時年十九聘處士譙秀以為  
 賓客盡其謫言在巴西威惠並著驤死遷大將  
 軍大都督侍中錄尚書總統封扶風公尋以大  
 將軍征寧州攻圍百餘日悉平諸郡雄大悅進  
 封建寧王以南中十三郡為建寧國既而雄疾  
 病侍奉左右及死受遺輔政期之殺班也征東  
 大將軍始初欲奉壽共圖討期壽不敢發始怒  
 說期殺壽期憚珩在北欲藉壽討珩故不許改

封壽為漢王食梁州五郡領梁州刺史代珩治  
 涪城壽威名遠振深為李越景騫等所憚每深  
 憂之既屯涪城歲終當入朝覲常自危懼一作危嫌

輒造漢中守將張才急書告邊疆寇警不時充  
 斥不可曠鎮故得不朝咸康三年冬北入漢中  
 破走司馬勲壽見期越兄弟十餘人年方壯大  
 并有強兵懼不自全乃數聘命巴西龔壯壯往  
 見壽是時岷山崩江水竭壽緣劉向之言而惡  
 之每問壯以自安之術壯以特殺其父及叔欲



假手報仇未有其由因說立事何如舍小從大以危易安開國裂土長爲諸侯名高桓文勲流百代矣壽從之陰與長史羅恒解思明共謀據成都稱藩歸順會養弟攸從成都病還死道中乃佯言越藥殺之又詐造妹夫任調書言期越當廢壽以惑群下群下信之乃誓文武許賞以城中資財得數千人南襲成都剋之獲期越誅宗族十餘人縱兵士虜掠民家至乃姦淫雄女及李氏諸婦多所殘害數日乃定

漢興元年夏羅恒與解思明李奕王利等勸壽稱鎮西將軍益州牧成都王以龔壯爲長史告下又勸令送邛都公於建康任調與司馬蔡興侍中李艷及張烈等勸壽稱帝壽亦生心乃命筮之占者曰可數年天子調喜曰一日尚足況數年乎思明日數年天子孰與百世諸侯壽曰朝聞道夕死可矣任侯之言策之上也遂以晉咸康四年背思明所陳之計僭卽皇帝位於南郊大赦境內殊死已下改元漢興國號曰漢以



董皎爲相國羅恒馬當爲股肱李奕任調李閔  
爲爪牙解思明爲謀主以安車束帛聘龔壯爲  
太師壯誓不仕壽所贈遺一無所受特聽縞巾  
素帶居師友之位拔擢幽滯處之顯列收立宗  
廟追尊父驤爲獻皇帝母咎氏爲皇太后立妻  
閻氏爲皇后世子勢爲太子更以驤爲始祖特  
雄舊廟爲大成廟下書言與期越別族分寧州  
興古永昌雲南朱提越嶲河陽六郡爲漢州又  
分漢德縣以爲梓潼郡割巴郡之宕渠宣漢漢  
昌三縣置宕渠郡尋省以縣並屬巴西郡凡諸  
制度多有改易遂以董皎爲丞相羅恒爲尚書  
令解思明爲廣漢太守任調爲鎮北將軍梁州  
刺史東夷校尉李奕爲鎮西將軍西夷校尉更  
代諸郡及卿佐皆用宿人及巴叅佐省交州以  
從子權爲鎮南將軍寧州刺史於是成都諸李  
子弟無復秉兵馬形勢者雄時舊臣近親及六  
郡士民皆見疎斥秋七月奕從兄廣漢太守軋  
與大臣通謀欲廢壽壽懼使子廣與大臣盟於



前殿徙軋爲漢嘉太守以李閎爲征東將軍荆

州刺史移鎮巴郡閎恭之子也八月蜀中久雨禾稼

損傷百姓饑疫壽命群臣極言得失草莽臣龔

壯上封事曰臣聞有陰德者必有陽報故于公

理獄高門待封伏惟獻皇帝寬仁厚惠宥罪甚

衆靈德洪洽誕鍾陛下陛下天性忠篤愛遺建

節志齊周霍誠貫神明而志緒違理顛覆顧命

管蔡旣興讒諛滋蔓大義滅親撥亂反正上指

星辰昭告天地歎血盟衆舉國稱藩天應人悅

白魚登舟震助威烈風順義神人誠允日月

光明而論者未諭權宜稱制今淫雨汜瀆垂向

百日禾稼損傷加之饑疫百姓愁望天其或者

將以監示陛下故也又前日之舉止以救禍陛

下之心本無大圖今久不變天下之人誰復分

明知陛下本心者哉且玄宮之讖難知而盟誓

顧違一旦疆邊有急內外騷動不可不深思長

久之策永爲子孫之計也愚謂宜遵前盟誓結

援吳會以親天子彼必不愛高爵重位以報大



功雖降階一等永爲靈德宗廟相承福祉無窮君臣銘勲於上生民寧息於下通天下之高理弘信慎之美義垂拱南面歌詩興禮上與彭韋爭美下與齊晉抗衡不亦休哉論者或言二州附晉則榮六郡人事之不便昔公孫述在蜀羈客用事劉備在蜀楚士多貴及漢征蜀殘民大半吳鄧西伐舉國屠滅誰復別楚蜀者乎論者或不達安固之基惜其名位在晉諸侯自有卿相司徒司空宋魯皆然及漢藩王亦有丞相今

義歸彼但當崇重豈當減削昔劉氏郡守令長方仕州郡國亡主易故也今日義舉主榮臣賴寧可同日而論乎論者又謂臣當爲法正臣蒙陛下大恩覆臣如天養臣如地恣臣所安至於榮祿無論漢晉臣皆不處臣復何爲當侔法正乎論者或言晉家必責質任及徵兵伐胡何以應之案晉不煩尺兵一國來附威卷四海廣地萬里何任之責胡之在北亦此之憂今平居有東北之虞縱令徵兵但援漢川猶差二門耳臣



附託深重忘疾病之穢實感殊遇冀以微言少補明時常懼殞歿不寫愚心辜負恩顧謹進愴惶伏願罪戮封上壽覽之不悅然拘前言秘而不宣九月僕射任頽謀反伏誅頽任太后之弟也因盡殺雄諸子納等

漢興二年春二月晉以南蠻校尉南郡太守庾翼鎮江陵遣武昌太守陳囂為輔國將軍梁州刺史趣子午又遣叅軍李松伐巴郡至江陽夏四月執壽征東將軍荊州刺史閔巴郡太守黃

植初壽許自牛鞞以東土斷與閔執政者以為不可乃止復不益兵故閔覆沒閔弟艷以是怨故與朝右有隙是時壽疾病羅恒解思明等復議奉晉計尋而巴郡破壽以為附晉晉當以兵威故不能自斷遂輟計五月拜奕鎮東將軍代閔守巴郡六月晉廣州刺史鄧嶽將兵擊寧州建寧太守孟彥率州人縛寧州刺史霍彪舉建寧降晉壽遣右將軍李位都討之秋七月癸卯大風暴雨震其端門壽深自悔責命群臣極盡



忠言勿拘忌諱

漢興三年春三月丁卯右將軍李位都攻拔丹川晉守將孟彥劉齊李秋等皆死之先是趙王石虎遺壽書欲與之連橫入寇約中分江南壽大悅遣散騎常侍王嘏中常侍王廣使於趙龔壯切諫不聽至是下書曰吳會遺燼久逋天誅今將大興百萬躬行天罰乃大修船艦嚴兵繕甲吏卒皆備糒糧秋九月以尚書令馬當爲六軍大都督假節鉞營東塲大閱軍士七萬餘人舟師泝江而上過成都鼓譟盈江壽登城觀之有吞噬江南之志羣臣咸諫曰我國小衆寡且吳會險遠圖之未易解思明又竊諫懇至壽不從於是命羣臣議其利害龔壯復上疏切諫以爲不如通晉羣臣皆以壯之言爲然叩頭泣諫壽乃止士衆咸稱萬歲冬十二月遣鎮東大將軍李奕攻牂柯太守謝恕恕保城拒守積日不拔會奕糧盡引還轉寇巴東守將勞揚戰敗死之壽將闕至自成都初闕爲晉所獲逃奔於趙



壽致書於石虎以請之署曰趙王石君虎不悅  
付中外議中書監王波議以爲不若爲書遺之  
并致楛矢石弩於壽遂遣閔還閔至壽乃下書  
曰羯使來庭貢其楛矢

漢興四年春正月壽以太子勢領大將軍錄尚  
書事壽承雄寬惠儉約得蜀人心又新行篡奪  
因循雄政未逞其志欲會李閔與王嘏等從鄴  
還盛稱石虎威疆宮觀壯麗鄴中殷實且言趙  
王虎虐用刑法王遜亦以殺爵御下並能控制

邦域城鎮心欣慕之民有小過輒殺以立威名  
又以郊甸未實都邑空虛工匠器械事用未足  
乃徙傍郡戶三丁已上者以實成都興尚方御  
府發州郡工巧以充之廣修宮室引水入城務  
於奢侈又廣太學起讌殿百姓疲於使役吁嗟  
滿道思亂者十室而九矣尚書左僕射蔡興切  
諫壽以爲誹謗殺之右僕射李嶷數以直言忤  
旨壽積忿非一託以他罪下獄誅之秋七月遣  
尚書廣漢李擴一作擴爲御史入南中擴祖毅晉



故寧州刺史以向與南人有舊故遣之擴從兄演自越雋上書勸壽歸正返本釋帝稱王壽怒殺之以威龔壯解思明等

漢興五年冬十月壽下書令州郡各舉明經者封好學侯

漢興六年夏四月壽寢疾五月疾篤常見李期蔡興爲祟秋八月辛亥卒是歲晉康帝建元元年也時年四十四在位六年謚曰昭文廟號中宗葬安昌陵壽初爲王好學愛士庶幾善道每

覽良將賢相建功立事者未嘗不反覆嘆咏故能征伐四剋拓地千里雄旣垂心於上壽亦竭誠於下號爲賢相及卽僞位多所更易常慕漢武魏明之爲人耻聞父兄時事上書者不得言先世政教自以爲勝之也

### 李勢

李勢字子仁壽之長子也初壽妻閻氏無子驥殺李鳳爲壽納鳳女生勢期夔勢姿貌拜翊軍將軍漢王世子

前作翊門校尉

勢身長七尺九寸腰帶



十四圍善於俯仰時人異之壽死僭即帝位

太和元年春正月大赦境內改元太和尊嫡母

閻氏為皇太后母李氏為太后妻李氏為皇后

拜弟廣為大將軍大都督錄尚書事封漢王其

餘子弟及文武進位各有差夏四月太史令韓

皓上言熒惑守心乃宗廟禮廢之譴勢命羣臣

議之相國董皎侍中王嘏等以為景武創業獻

文承基至親不遠無宜疏絕乃更令祭祀始祖

特太宗雄同號曰漢王是月晉遣征西將軍領

南蠻校尉庾翼率益州刺史周撫西陽太守曹

據來伐破別將李桓於江陽乃為檄示勢曰告

巴蜀士民夫昏明代運否終則泰賢哲觀機以

知變不肖滅亡以取禍晉皇運中消軋綱暫弛

曜勒窮寇肆暴神州李劉啟逆竊逼岷川翼以

不才任符分陝未能仰宣皇化招携以禮而使

三邦之民制於犬羊之羣元元之命懸於豺狼

之口所以假寐永歎疾疢如首者也凡百黎民

秋毫不犯檄到勉思良圖自求多福無使蘭艾



十六國春秋卷之十八  
同焚永作鑒誠信誓之明有如皎日

太和二年秋八月漢王廣以勢無子求爲太弟  
勢不許馬當解思明諫曰陛下兄弟不多若復  
有所廢將益孤危固請許之未幾疑馬當等與  
廣有謀命相國董皎收馬當解思明斬之夷其  
三族遣太保李奕襲廣於涪城貶爲臨邛侯廣  
尋自殺思明有計謀疆於諫諍被收歎曰國之  
不亡以我數人在也今其殆矣言笑自若而死  
馬當素得民心及其死士卒無不哀之自此之  
後無復紀綱及諫諍者冬十二月勢將爨頽奔  
附於晉

嘉寧元年秋九月巴東太守楊謙擊勢將申陽  
走之獲別將樂高冬十月天大雨血於江南數  
畝許鎮東大將軍太保奕自晉壽舉兵反寇陷  
巴東蜀人多有從者衆至數萬勢登城拒戰奕  
單騎突門門者射而殺之衆乃潰散勢旣誅奕  
大赦境內改元嘉寧蜀土先是無獠至此始從  
山出自巴西至犍爲梓潼布滿山谷十餘萬落



不可禁制大爲民患勢旣驕奢貪吝性愛財色  
常殺人而取其妻又納奕女爲后耽於淫樂不  
惜國事夷獠叛亂軍守離缺境土減削加之饑  
饉宇內蕭條更多忌害誅戮大臣刑獄酷濫人  
懷危懼斥外父祖舊臣親信近習左右因行威  
福修飾屋宇群下諫諍一無所納又常居內罕  
見公卿史臣屢陳災譴乃加董皎爲太師以名  
位優之實欲與分災膏

嘉寧二年春正月乙卯晉遣安西將軍荊州刺

史桓溫帥征虜將軍益州刺史周撫輔國將軍  
南郡太守譙王司馬無忌建武將軍江夏相袁  
喬等來伐先是溫謀伐蜀衆咸以爲不可袁喬  
勸之曰夫經略大事固非常情所及智者了於  
心胸然後舉無遺策耳

紀事本末作不必  
待衆言皆合也今爲

天下之難者胡蜀二寇而已蜀雖險固方胡爲  
弱將欲除之先從易者今遡流萬里經略天險  
彼或有備必不可剋然蜀人自以斗絕一方恃  
其完固不修攻戰之具若以精卒一萬輕車速



進比彼聞之我已入其險要李勢君臣不過自  
力一戰擒之必矣論者恐大軍旣西胡必覬覦  
此又似是而非何者胡聞萬里征伐以爲內有  
重備必不敢動縱復越逸江渚諸軍足以守境  
此無憂矣且蜀土富貴號稱天府管諸葛武侯  
欲以抗衡中國今誠不能爲害然勢據上流易  
爲寇盜若襲而取之有其人衆此國之大利也  
溫從之使喬以江夏相領水軍二千人爲前鋒  
自將大衆爲之後繼軍次青衣勢大發軍拒守  
遣叔父右衛將軍福與從兄鎮南將軍權前將  
軍督堅等帥數千人自山陽趨合水拒溫謂溫  
從步道而上諸將皆欲設伏江南以待晉師督  
堅不從率諸軍自江北鴛鴦碕渡向犍爲三月  
溫至彭模去勢已近議欲分爲兩軍異道俱進  
以分蜀兵之勢袁喬曰今懸軍深入萬里之外  
置之死地士無返顧之心勝則大功可立不勝  
則噍類無遺當併力合衆以取一戰之捷若分  
軍爲兩則衆心不一萬一偏敗大事去矣不如



全軍而進棄去釜餽齎三日糧以示無還心勝  
 可必也溫從之留叅軍孫盛周楚將羸兵守輜  
 重溫自將步卒直抵成都右衛將軍福等進攻  
 彭模孫盛奮擊走之溫進遇權三戰三捷勢兵  
 敗散自間道歸成都鎮東將軍位都迎詣溫降  
 督堅至捷為知與溫異道自沙頭津濟比至溫  
 已軍於成都之十里陌堅眾自潰勢悉眾出戰  
 於成都之笮橋文選註  
作柞字溫前鋒不利叅軍龔護  
 戰死矢及溫馬首眾懼欲退而鼓吏誤鳴進鼓

表喬拔劍督士卒力戰遂大破之溫乘勝長驅  
 至於城下縱火燒其城門勢眾大懼無復鬪志  
 中書監王嘏散騎常侍常璩等勸勢出降勢以  
 問侍中馮孚孚言昔吳漢征蜀盡誅公孫氏今  
 晉下書不赦諸李雖降恐無全理勢乃夜開東  
 門與督堅走九十里至晉壽葭萌城丁亥勢使  
 散騎侍郎王幼送降文於溫曰偽嘉寧二年三  
 月十七日略陽李勢叩頭死罪伏惟大將軍節  
 下先人播流恃險因釁竊有汶蜀勢以闇弱復



統末儲偷安荏苒未能改圖猥煩朱軒踐冒險阻將士狂愚干犯天威仰慙俯愧精魂飛散甘受斧鑕以釁軍鼓伏惟大晉天網恢弘澤及四海恩過陽日逼迫倉卒自殺草野卽日到白水城謹遣私署散騎常侍王幼奉牋以聞并勅州郡投戈釋杖窮池之魚待命漏刻勢尋輿觀面縛軍門溫解其縛焚其襯遷勢及叔父福等十餘人於建康封爲歸義侯晉升平五年卒宕渠卽古賓國今有賓城秦始皇時有長人長五丈

見於宕渠秦太史令胡毋敬曰五百年後其地必有異人爲大人者及雄稱尊號祖先出自宕渠有識者皆以爲應之譙周亦云我死後三十年當有異人入蜀蜀由之亡蜀亡之歲去周三十十二年又著讖云廣漢城北有大賊曰流曰特攻難得歲在玄宮自相剋又曰宋岱不死則孫臏不交市三旬之間流離之首懸於轅門又惠帝之世蜀童謠曰郫城堅盜底穿郫中細子李特細又曰江橋頭闕下市成都北門十八子又



曰巴郡葛當下美巴郡皮又曰有客有客來侵  
門陌其氣欲索至是而悉應焉先是勢未亡時  
頻有怪異宮人張氏有冶容勢寵之一夕化爲  
大斑理蛇長丈餘送於苑中夜復來寢床下勢  
懼遂殺之復有鄭美人勢亦寵之化爲雌虎一  
夕食勢寵姬未幾而死成都北鄉有人望見女  
子避入草中往視見物如人有身形頭目無手  
足而動搖不能言又有驢無皮毛袒肉飲食數  
日而死涪陵民樂氏婦頭上生角長三寸凡三  
截之又馬氏婦姪身兒從腋下生其母無恙兒  
亦長育廣漢馬生角長大各半寸有馬生駒一  
頭兩身相着六耳無目二陰一牡一牝李漢家  
舂米米自臼中跳出遂歛於箕中又跳出瀉於  
簞中又跳出有猿居鳥巢至城下大雨血地仍  
震又連生毛鷓鴣集于城下江源又生草高七  
八尺華葉皆赤子青如牛角天譴甚多不能悉  
紀特以晉太和元年歲在辛酉起兵至勢嘉寧  
二年時晉永和三年歲在壬戌而降於晉凡六



世合四十七年

鹽官姚士燾校

春秋第七十八卷

蜀錄四

春秋卷第七十九

魏

散騎常侍

崔

鴻

撰

李輔

李輔字玄政慕之長子特兄也銳勇有武幹初益州刺史趙廞殺其弟威寇將軍庠及其子弘等慮特等為變乃命輔與特驤俱為督將安慰其眾及特承制拜為驃騎將軍官桑之敗為益州刺史羅尚所殺雄即王位追謚齊烈王子忠嗣



李庠

李庠字玄序特第三弟也少以氣烈爲鄉里所稱仕郡督郵主簿當官皆以美績著聞元康四年察孝廉不就後以善騎射舉良將亦不就州郡以庠才兼文武舉房異一作秀異固以疾辭州郡不聽以其名上聞中護軍切徵不得已而應之拜中軍都騎督弓馬便捷膂力過人時論方之鮮卑文鴛洛陽方亂稱疾去官性在任俠好濟人難以是州黨莫不附之與六郡流民避難梁

益道路有疾病饑厄者常營護隱卹賑施貧乏大收衆心初至蜀益州刺史趙廞敬異之一作深器

與論兵法無不稱善每謂所親曰李玄序蓋亦一時之關張也以爲冠軍將軍及特有異志委以心膂之任表爲部曲督使招合六郡壯勇至萬餘人以討叛羌功表爲威寇將軍假赤幢曲蓋封陽泉亭侯賜錢百萬馬四十匹廞忌害其能誣以大逆殺之被殺之日六郡士庶莫不流涕時年五十五雄卽成都王位追謚梁武王



李驥

李驥字玄龍慕之少子特弟也驍銳武幹與諸兄弟等初殺縣令屯聚樂鄉起兵應特特承制拜驍騎將軍每從征伐屢立戰功特死雄立益州刺史羅尚數攻郫城雄使朴泰誘尚襲郫城約爲內應尚信之泰要發火遣隗伯諸軍攻郫驥設伏於外以長梯上伯軍伯軍見火起爭緣梯上驥因放兵擊之大破尚軍遂攻捷爲斷尚糧道殺太守龔恢及功曹楊渙進增益州殺別駕許延延妻杜氏有美色驥欲納以爲妻杜氏號哭守夫尸罵曰汝輩逆賊無道死有先後寧當久活我杜家女豈爲賊妻也何不速殺我驥怒遂殺之雄卽王位以驥爲太傅晉永嘉四年梓潼內史焦登據涪城時羅尚死長沙太守皮素代爲益州進治三關驥急攻登素勅張順楊顯救登尚子宇恨登不供其軍實素怒宇欲治其罪爲宇所殺建平都尉暴重殺宇巴郡大亂不果救登驥於是攻登益急登兵窮士饑遂生



之送之於雄雄乃殺登巴西梓潼盡爲雄有  
矣其後雄梁州刺史李鳳叛於巴西驤以太傅  
行大將軍討斬之轉攻越嶲及朱提獲太守李  
釗進都督中外諸軍事大將軍領中護軍西夷  
校尉錄尚書總統以玉衡二十年冬卒追贈相  
國謚曰漢獻王及壽僭卽帝位追尊謚曰獻皇  
帝

### 李蕩

李蕩字仲平特次子也好學有睿觀特承制拜  
鎮軍將軍特初稱制晉河間王司馬顒遣督護  
衙博討之進屯梓潼朝廷復遣廣漢太守張微  
軍於德陽南夷校尉李毅又遣使兵五千助益  
州刺史羅尚尚遣督護張龜軍於繁城三道並  
進以攻特營特使蕩與雄襲博特躬擊張龜龜  
衆大敗蕩又與博接戰連日博亦敗績死者大  
半蕩追博至漢德博走葭萌蕩轉掠巴西巴西  
郡丞毛植五官襄珍以郡迎降蕩撫恤初附百  
姓安之進攻葭萌博又遠遁其衆悉降遂拔梓



潼巴西郡特於是進攻張微微依高據險與特相持連日時特與蕩分爲二營微旻特營空虛遣步兵循山攻之特逆戰不利山險窘迫衆不知所爲羅準任道皆勸引退特量蕩必來故不許微衆至稍多山道至狹唯可一二人行蕩軍不得前謂司馬王幸曰父在深寇之中是我死日也乃衣重鎧持長矛大呼直前推鋒必死殺千餘人微衆來相救蕩軍皆殊死戰無不一以當百微衆遂潰拔特於重圍之中特欲釋微還

涪蕩與王幸進曰微軍連戰士卒傷殘智勇俱困宜因其弊一戰擒之若舍而寬之微養病收亡餘衆更合圖之未易也特從之復進攻微微潰圍而走蕩率水陸追之殺之於巴西生擒其子存以微喪還之其後二年官兵殺特於官桑蕩與雄共保北營羅尚遣督護張龜何冲左汜等軍繁城涪陵藥紳等起兵應尚蕩攻紳破之左汜率衆乘虛襲營氏符成隗伯時在營中叛以應汜營垂欲破會蕩破紳還適與汜遇遂大



破之成伯將其黨突出詣尚蕩策馬追擊中矛而死雄秘不發喪以安衆心及雄卽成都王位追贈廣漢壯文公

李始

李始字伯起特長子雄異母兄也特承制拜武威將軍雄既僭位累遷太保加折衝將軍善撫士衆衆多歸之時人爲之語曰欲養老屬太保及期之殺班也以始爲征東大將軍代建寧王越鎮江陽始先欲附壽謀共討期壽不從始怒說期取壽期又不許後壽用龔壯計襲破成都期自殺始亦被誅并其兄弟十餘人

李瑒 稚 珩

李瑒蕩長子也次稚次都又次珩初瑒爲侍中中領軍稚以安東將軍屯晉壽武都氏楊難劼來奔稚受其賂遺縱還武都難劼恃險驕慢多爲不法攻走陰平太守羅演演稚之舅也稚自悔失計白兄瑒亟欲請討雄許之乃遣瑒與稚及將軍樂次費佗李軹等由白水橋進攻下辨征東



將軍壽督瑒弟珩攻陰平難劼遣軍來拒壽珩  
不得進而瑒稚徑至下辨武街難劼斷其歸道  
四面攻之深入無繼皆爲氏衆所殺士卒死者  
數千人瑒有才望志尚雄欲傳以爲嗣及聞其  
死深痛悼之不食數日言必流涕雄死班嗣僞  
位珩與期越咸來奔瑒珩  
越還鎮并出  
期爲梁州刺史班猶豫未許反遣珩還鎮涪城  
期越竟弑班於臨次并殺其兄領軍都珩遂奔  
晉歷巴郡襄陽宜都太守龍驤將軍永和三年

從征西至於山陽戰死

李安

李安字武龍少養於外家羅氏元康元年避地  
入蜀從特征伐以勇烈聞特遂子之驍騎將軍  
驤引爲帳下督護數有戰功甚見信愛羅尚遣  
符成隗伯攻郫城驤逆戰不利被傷落馬卧未  
能起士衆皆散惟安與任回在左右隗伯帥數  
千騎來叱安曰武龍吾所取有人卿宜避我去  
安瞋目呵之曰吾不相與因躍馬直前刺之伯



遂巡而退

李離

李離特妹婿瑒之子也初爲梓潼太守朝廷遣建平太守孫阜進次德陽瑒勸流降阜離聞之因與雄謀襲阜軍阜軍敗績流深竒之委以重任雄卽成都王位進爲太尉事無巨細悉以任之永嘉初關中流民鄧定旬氏等掠漢冬辰勢以叛巴西太守張燕遣牙門武敷漢國郡丞宣定圍之鄧定等求援於雄雄遣離與李璜等帥

兵入漢中赴援太守杜孟治聞離至命燕釋圍保城離至先破武敷營次攻宣定復破之燕懼將百騎走離等復大破之州軍皆散孟治開門退走離盡徙漢中民於蜀遂屯據梓潼其後部將天水旬琦張金苟等叛殺之送離母子於羅尚尚斬以徇遂分其室

羅氏

特妻羅氏略陽人僕射羅演之妹也生蕩與雄時蕩等屯北營羅尚遣牙門左汜黃閭來攻營



中氏符成隗伯叛應之羅氏擐甲拒戰伯手刃傷其面羅氏奮擊不輟氣烈益壯蕩還得免雄稱成都王尊爲王太后及卽帝位尊爲皇太后以雄玉衡元年卒雄信巫覡之言多有忌諱至欲不葬司空趙肅切諫雄乃從之又欲申三年之禮羣臣多諫弗納太傅驤謂司空上官惇曰今方難未靖一作彌吾欲固請不聽主上終諒闇君以爲何如惇曰三年之喪自天子達於庶人故孔子曰何必高宗古之人皆然但漢魏以來

天下多難宗廟至重不可久曠故釋縗經至哀而已驤曰任回方至此人決於行事且上常難違其言待其至當與俱請及至同回入見驤免冠流涕固請公除雄號泣不許回跪而進曰今王業初建凡百草創一日無主天下惶惶管武王素甲觀兵晉襄墨經從戎豈所願哉爲天下屈已故也願陛下割情從權永隆天保遂強扶雄起釋服親政雄涕泣從之

任氏



雄妻任氏天水人僕射任頽之姊也以建興元年立爲王后任氏無子有妾子十五人長子越次子霸第四子期皆爲任氏所養諸子保約等期旣僭立尊爲皇太后拜兄越相國大將軍錄尚書事封建寧王仲兄霸鎮南大將軍弟保鎮西大將軍約等皆有拜授其後盡爲壽所殺任氏亦以憂憤死

閻氏

壽妻閻氏略陽人閻彘之族女也

一云天水人

以漢

興元年立爲皇后閻氏無子壽納李鳳女生勢及廣閻氏子之勢後嗣位尊爲皇太后署廣爲大將軍封漢王廣以勢無子求爲太弟勢不許疑馬當等與廣有異謀收當等殺之遣兵襲廣於涪城貶爲臨邛侯廣尋自殺

鹽官姚士粦校

春秋第七十九卷



蜀錄五

春秋卷第八十

魏散騎常侍崔鴻撰

閻彧一作式

閻彧天水人也特初起兵數使彧至羅尚求寬流民限期乃版為始昌令及特承制任為謀主雄即王位累遷尚書令時建國草創素無法紀諸將恃恩各爭班位彧上疏曰夫為國制法動尚仍舊漢晉故事惟太尉大司馬執兵太傅太保父兄之官論道之職司空司徒掌五教九土



之差秦寘丞相總領萬機漢武之末遂一作越以  
大將軍統政今國業初建凡百未備諸公大將  
班位有差降而競請私寘不與典故相應宜立  
制度以爲楷式雄從之其後去雄依太尉離於  
梓潼部人訇琦張金苟等叛殺離或亦被害雄  
甚悼之

尹奉

尹奉南安人晉永昌元年以零陵太守爲寧州  
刺史南夷校尉加安西將軍奉威刑緩鈍政治  
不立爲大將軍壽所破遂舉州降時晉咸和八  
年也雄遷奉於蜀南中盡爲雄有其後奉仕李  
氏位至衛將軍右丞相

王載

王載字元始新都人也有才智幹略娶寧州刺  
史李毅女秀載將家避地在南適毅叻州文武  
以秀明達有父風一作才遂推領州事又以載領  
南夷校尉龍驤將軍秀獎厲督戰食糧已盡但  
茹草炙鼠爲食秀伺夷怠緩輒出軍掩破之載



後爲漢嘉太守太傅驤攻破朱提等郡載懼以郡迎降仕雄至騎都尉龍驤長史

李釗

李釗字世康廣漢郫人也祖旦字欽宗光祿郎中主事父毅字允剛歷寧州刺史加龍驤將軍封成都內侯釗世秉儒學有格望以父任爲謁者僕射除壽林侯相不就爲尚書外兵郎晉光熙三年毅爲叛夷所攻疾病困於窮城不能討戰上表請援時雄寇蜀郡救兵不得進釗聞父

阨表求赴難馳至牂柯夷復斷道停住交州以寧州城中無穀父疾病未知吉凶遂不食穀惟茹草首尾三年得至寧州父已喪文武復偪釗領州府事懷帝乃除釗平寇將軍領安夷護軍西夷校尉大得衆心及王遜爲寧州刺史表釗爲朱提太守尋遷越嵩治南廣以禦雄數破雄軍殺大將樂初雄王衡十三年太傅驤與任回分兵攻朱提越嵩城陷被獲尋而自蜀逃歸遜仍以釗守越嵩雄復遣驤及任回攻之釗自南



秦與漢嘉太守王載並力來拒戰於溫水敗績  
遂以二郡迎降釗到成都雄待遇甚厚朝廷儀  
式垂紀之禮皆決於釗命班以師禮事之

范長生 貢

范長生涪陵丹輿人也一名延久又名九重又  
名支字元壽巖居穴處求道養志甚有名德兼

善天文頗曉術數年過百歲

菟林伐山云長生先事劉玄德至特

時一百三十餘年

爲蜀人所重奉之如神雄欲迎致立

爲君長而臣之長生固辭曰推步大元五行大

會甲子祚終於李非吾節也雄卽成都王位長

生自西山乘素輿詣成都雄迎之於門執版延

接卽日拜丞相尊之曰范賢故又名賢勸雄稱

尊尋加長生天地太師之號封西山侯以雄王

衡八年卒子貢嗣貢初爲侍中後嗣父爵爲丞

相晉永和三年勢爲大司馬桓溫所滅其遺黨

故尚書僕射王誓鎮西將軍鄧定平南將軍王

潤將軍隗文蕭恭文等舉兵反衆各萬餘溫自

擊定使袁喬擊文皆破之使益州刺史周撫鎮



彭模斬王誓王潤溫留成都三十日振旅還江陵尋而鄧定隗文等入據成都征虜將軍楊謙棄涪城退保德陽遂陷日南殺督護劉雄共立賁爲帝而奉之以父長生爲雄國師蜀民愛之賁由是以妖異惑衆聚至數千蜀人相率歸附後二年周撫與龍驤朱燾擊賁斬之益州遂平

### 楊褒

楊褒略陽人仕特將兵都尉雄稱尊號累遷左僕射尚書令直言敢諫無所忌諱雄初得蜀用

度不足諸將每進金銀珍寶多有以得官者褒諫曰陛下爲天下主當網羅四海英豪何有以官爵買金銀耶雄遂辭謝之後雄因酒醉推中書令杖太史令褒進曰天子穆穆諸侯皇皇安有天子而爲酗也雄慙而止雄無事小出褒於後持矛馳馬過雄雄怪問之對曰夫統天下之重者如臣乘惡馬而持矛急之則慮自傷緩之則懼其失是以馬馳而不制也雄悟卽還遂不復出晏平三年冬十二月褒卒贈丞相太師謚



曰莊

譙秀一作焦

譙秀字元彥巴西人也祖周以儒學著稱顯名蜀朝秀少而靜默不交於世知天下將亂預絕人事雖內外宗親不與相見郡察孝廉州舉秀才皆不從及雄據蜀略有巴西太傅驤驤子壽皆慕秀名具束帛安車徵之亦不應禮一云或或以威迫而秀終不應命常冠弁弊衣躬耕山藪龔壯常歎服焉桓溫滅蜀上疏薦之朝廷以秀年在篤老兼

道遠故不徵遣使勅所在四時存問尋而范賁蕭敬相繼作亂秀避難宕渠川中鄉人宗族依憑之者以百數秀年出八十衆人以其篤老欲代之負擔秀拒曰各有老弱當先營護吾氣力自堪此不以垂朽之年累諸君也年九十餘無疾而卒

龔壯

龔壯字子偉巴西處士也潔已自守與鄉人譙秀齊名父叔皆為特所殺壯欲復仇力弱不能



故積年不除喪壽成漢中與期有隙數以禮聘壯壯雖不應聘恐其見害乃不得已往見之壽因問以自安之策壯說曰巴蜀之民本皆晉臣節下若能發兵西取成都稱藩於晉誰不爭爲大之策也惟將軍圖之壽以爲然遂率衆攻成都克之旣卽僞位以安車束帛聘爲太師壯誓志不仕其所贈遺一無所受特聽縞巾素帶居師友之列會天久雨百姓饑墊壯上書說壽歸

晉允天心應人望永爲國藩如此則名垂不朽福流子孫壽省書內慙遂秘藏之壽又遣使入胡欲連衡爲寇約分天下壯切諫曰陛下與胡通孰若與晉通胡豺狼國也旣滅晉不得不北面事之若與之爭天下則強弱異勢此虞虢之成範已然之明戒願陛下孰慮之群臣咸以壯言爲然壽乃止壯因作詩七篇託言應璩以諷壽壽報曰省詩知來意若今人所作乃賢哲之話言也若古人所作則死鬼之常辭耳壯以爲



人之行莫大於忠孝既假壽弒期私報父叔之  
仇又欲使其歸順朝廷以明臣節壽既不從乃  
詐稱耳聾手不制物癖疾歸家唯研考典籍譚  
思文章以經史自娛終身不復至成都至勢嘉  
寧初卒壯每歎中夏多經學而巴蜀鄙陋兼遭  
李氏之難無復學徒乃著邁德論文多不載

張寶

張寶略陽人仕雄爲別將天水旬琦等叛殺太  
尉離寶弟全在琦中雄謂寶曰汝能得梓潼我  
以李離之官賞汝寶素兇勇乃反爲奸先殺人  
而亡奔梓潼琦等信之委以心腹會益州刺史  
羅尚遣使至梓潼慰勞琦等琦等出迎寶從後  
閉門琦等奔巴西遂得梓潼雄卽日拜寶爲太  
尉

李洪

李洪廣漢人聚流民數千入定陵作亂自稱李  
勢子太和中因刺史劉季連失於撫綏巴西人  
趙續伯蜀人李金銀等共推洪爲王言當以聖



道王年號鳳凰私署百官妖惑百姓季連討斬之

李高

李高隴西人也詐稱李雄子攻破涪城梁州刺史楊亮棄郡遁走捷爲太守周楚遣其子帥兵討平之

劉玄

劉玄漢昭烈帝之曾孫甘陵王永之孫也永以咸熙元年東遷洛陽拜奉車都尉封爲鄉侯值永嘉大亂劉氏子孫絕滅唯玄奔蜀雄署爲安樂公以嗣後主後永和三年討勢孫盛參戎行見玄於成都云

鹽官姚士粦校

春秋第八十卷



八





